

## Turnbericht Gym-Cup, 1.Mai

### DR Dättlikon

Scho am halbi 8i am Sunntig 1.Mai isch Treffpunkt bim Schuelhus Dättlike xi für eus no bizli müede Turnerinne. Nach und nach simmer itrudlet, bis au di letzt no itroffe isch... mer muess aber scho säge: Alli sind pünktlich xi! Wo mir denn scho ca am 8i z'Elgg itroffe sind (wo mir doch erst am 9.55 turne müend), händ eus die zwei Fahrerinne Flavia & Domi verrate sie heged ebe gar nöd demit grächnet, dass alli pünktlich scho am halbi 8i usem Bett und parat sind! Aha! Also hät euses Grüppli mal en Festbank ignoh und det echli witer töset, gfreore, Heftli gläse oder sogar de Zmorge no fertig gässe: Banane oder Spaghetti zum Zmorge, was au immer, isch doch beides guet! Nacheme Zitli sind den au di 4 direkt-Fahrerinne acho und händ alli freudig begrüesst. De ersti Fan hämmer auscho uf sicher gha: De chlini Laurin Wäckerli, die treui Seel, juhu!

So, langsam isch es Zit worde, mal eus für die ernst Aglegeheit vom hütige Tag vor z'bereite! Also isch s Dättliker Grüppli vo 14 junge Fraue uf d Wiese spaziert. Nacheme churze und wachrüttelnde Ilaufe hend mir eusi Team-Aerobic 3 Mal duregmacht und nomal d Chlinigkeite nahgfilet. Au s'Inelaufe isch no besproche worde, mir sind also eigentlich total bereit xi für euse grossi Uftritt! Jetzt händ sich nur no die einte müesse go umzieh und es hät chöne losgah!

Churz vorem 9.55, bim zueluege vode eusne „Konkurrentinne“ hät dänn aber scho s'einte oder s'andre Chnü zitteret und mir händ müesse säge: „Die chönds aber schono choge guet!“ – Aber: „Nix da, jetzt chömed mir und zeigeds allne!“ Scho simmer uf em Platz gstande und vorem ganze Publikum. Immerhin isch scho en 2te Fan cho! S Mami Neumeister. Mir händ alles gäh, trotzdem simmer nöd wükli miteme siegessichere Gsichtsudruck vom Feld tschögelet, wie's eus d Fränzi vorher doch befohle hät! Ischs ächt drah gläge, dass sich da es paar chlini Fehlerli igschliche händ? D Note häts zeigt: es 7.68 händ mer becho und sind scho es bizli entüsch xi. Janu, mir händ ja nomal e Chance und det zeigemer was mer druf händ! Jetzt isch nämli e Pause bis am 1 agseit xi. Zum plegere, pläuderle, sünnele und ässe!

Nach und nach sind den no witeri Fans itrudlet und vilicht isch dadurch au d'Motivation chli gstiege. Wo mir eus nämli für de 2ti Durchgang vorbereited händ, sind einigi voller Energie umeghüpft. Vilicht isch das aber au so xi will d'Fränzi eus nomal usdrücklich druf hüigwise hät, mit meh Power z'turne!

Scho ganz gli hät dän d'Uhr auscho uf 20 vor 2 zeigt und das heisst, euse 2ti grossi Uftritt vo hüt isch drah! Leider häts dasmal en chline Umfall gäh: D'Claudia isch bi ihrere Landig vom Sprung vom Domi-Andrea-Turm umknickt. Für d'Claudia aber keine Sache, sie hät dureghebet bis am Schluss, Bravo! Im Allgemeine sind nach dem 2te Mal d'Gsicher zfridener, ich wür säge, da isch scho e chlini Steigerig xi! Und tadaa: Tatsächlich, s'2te Mal häts für eus es 7.78 gäh! Also hämmer doch no echli meh druf gha.

2 am Namittag isch es jetzt xi, und die meiste Damerieglerinne händ sich auscho uf de heiwäg gmacht. Nur wenigi händ no chöne oder welle oder möge für d Rangverkündigung blibe. Ich bi au eini vo däne xi wo Hei gange isch, also chani leider nur vo dem brichte. Euses Büssli gfüllt mit 7 Lüt, drunder d'Fahrerin Domi, händ e glatti heifahrt gha. Alli sind chli müed (oder au übermüedet) xi und zfride. Mir händ glaub alli gwüst, dass da no einiges muess gah fürd Turnfester aber glichzeitig au xeh, dass e Steigerig immer dine isch, wänn mer sich so richtig-richtig is Füdli chlämmt! Und mit dem Wüsse und au Zfrideheit händ alli no en schöne, erste Mai Sunntig zu Ende verbracht.

Für d'Damäriegä Dättlikä, Natalja Neumeister